

Visoki predstavnik odao poštu Hatidži Mehmedović



Visoki predstavnik Valentin Inzko posjetio je mezarje u Sućeski kako bi danas, na treću obljetnicu njene smrti, odao poštu Hatidži Mehmedović.

“Hatidža Mehmedović najsnažnija je osoba koju sam upoznao u svom životu. Njena lavovska borba za istinu i pravdu, njena lucidnost, razboritost i požrtvornost za čovjeka, kojoj sam imao priliku svjedočiti godinama, dovela me danas na njen mezar, na treću obljetnicu od kada se ova žena velikog srca preselila u ljepši svijet, svojim sinovima i suprugom.

Imao sam veliku potrebu pokloniti se ovoj impresivnoj ženi od koje sam naučio da je “oprost vrhunac ljubavi”.

Kada iz usta majke, kojoj su ubijena oba sina, koje je ukopala tek 2010. godine, čujete kako govori o “nužnosti pomirenja”, kada je čujete kako vapi za riječi “oprosti”, ili pak koja javno pozove sve “koji su sudjelovali u genocidu da mogu doći na komemoraciju ili neki drugi dan ako imaju potrebu na mezarju zatražiti oprost od žrtava da bi našli svoj mir, da su svi dobrodošli”, čovjek se uistinu upita odakle jednoj majci tolika snaga i sabranost. To je majka koja je pateći, trpeći svoju bol do neba, duhovno, već za ovozemaljskog života, stigla u nebeske visine.

Hatidža me inspirirala da radim na projektu “Oprostom pobjeđuje čovječanstvo”. Do sada planetarno poznata Srebrenica, po genocidu na kraju 20. stoljeća, trebala bi

postati planetarni simbol snage oprosta Majke, kazao je visoki predstavnik Valentin Inzko.

– Svi mi živimo u istoj kući. Ako nastavimo stalno se svađati svima će biti loše. Bez pomirenja i oprosta ovdje nitko nema budućnosti. Još uvijek nerođena djeca neće imati budućnosti ako se mi ne pomirimo s našim susjedima, kazala mi je ova velika, mudra žena u zenitu svog života, a ja sam to zabilježio kao Hatidžin testament. Danas želim javno uputiti taj Hatidžin testament svim građanima ove napaćene zemlje na promišljanje, apostrofirao je na kraju visoki predstavnik.